

# 'Titikberatkan kebudayaan bagi kukuhkan persefahaman'

PENCAK SILAT - 8 JUL 1985

KUALA LUMPUR, Ahad — Asean dan pertubuhan-pertubuhan serantau yang lain hari ini diseru supaya menitikberatkan aspek kebudayaan dalam mengukuhkan lagi persefahaman di bidang politik, ekonomi dan sosial di kalangan negara-negara merdeka.

Usaha ini bersesuaian dengan masa depan paksi industri pelancongan yang dijangka berpindah dari Barat ke Timur, kata Menteri Kebudayaan, Belia dan Sukan, Datuk Dr Sulaiman Daud.

Perubahan pelancongan dalam "Era 2000" itu juga akan menjadikan Wilayah Asia Pasifik sebagai tumpuan baru perdagangan antara bangsa, katanya dalam ucapan yang dibacakan oleh Setiausaha Parlimen Kementeriannya, Haji Awang Jabar di Perasmian Sidang Umum Pertama Persekutuan Pencak Silat Antarabangsa (Persilat) hari ini.

Persidangan yang bermula dari 6 hingga 10 Julai ini disertai oleh 23 wakil persatuan silat Indonesia, Singapura dan Malaysia.

**B. Hanan (M)**

Menurut Datuk Dr Sulaiman, kemelesetan ekonomi dunia serta keruntuhan tamadun dan nilai-nilai moral Barat, memberi peluang kepada negara-negara timur untuk menegakkan semula sifat-sifat budaya warisan mereka yang luhur dan tinggi itu.

## Meracuni

Sebagai contohnya, kebangkitan ekonomi Jepun dan Korea Selatan didorong oleh kemantapan warisan dan kekukuhan kebudayaannya.

Bagaimanapun, dalam menjalankan usaha itu, masyarakat juga perlu berhati-hati terhadap pengaruh Barat yang boleh meracuni pemikiran dan perjuangan negara-negara Timur sekarang.

"Kita harus berhati-hati dengan 'cultural imperialism' bentuk baru



**Datuk Dr Sulaiman Daud**

melalui bahan bacaan, media elektronik dan unsur-unsur yang mempengaruhi fikiran dan perubahan nilai-nilai dalam kebudayaan," katanya.

Mengenai perkembangan seni silat, beliau berkata: "Silat mestilah dikekalkan dalam kebudayaan kita kerana kaitan yang amat rapat dengan sistem sosial, politik dan kebudayaan Timur."

Oleh itu langkah penebusan Persatuan Pencak Silat Antarabangsa (Persilat) pada 11 Mac 1980 yang dianggotai oleh Indonesia, Malaysia dan Singapura itu adalah penting dan perlu ditegaskan, tegas Menteri Kebudayaan itu.

Bagi menjayakan Persilat, kementeriannya menubuhkan Persatuan Silat Kebangsaan (Pesaka) pada tahun 1983.

Beliau juga mengingatkan guru-guru silat supaya mempunyai sikap lebih terbuka serta pandangan positif terhadap seni silat bagi membolehkannya berkembang di peringkat antarabangsa.